



LE GOUVERNEMENT
DU GRAND-DUCHÉ DE LUXEMBOURG
Ministère de la Santé
et de la Sécurité sociale

Äntwert vun der Madamm Ministesch fir Gesondheet a sozial Sécherheet op d'parlamentaresch Fro n° 3459 vum 14. Januar 2026 vun der honorabeler Deputéierte Madamm Alexandra Schoos.

1) Wéi reagéiert d'Madamm Minister allgemeng op den Artikel a besonnesch op de Fakt, datt d'Direktioun vun der CNAP muss dovun ausgoen, datt hir Ëmsetzung an d'Interpretatioun vun der Reform riskéieren, geriichtlech ugesicht ze ginn?

Déi praktesch Ëmsetzung vun de Moosname sinn am Gesetz vum 19. Dezember 2025¹ festgehalen. All Decisioun vun der Pensiounskeess ka geriichtlech ugesicht ginn an do maachen déi nei Dispositiounen keng Ausnam. Mat dem Bezuch op een Opgoen op d'Recht op eng virgezunne Pensioun ab dem Alter vu 60 Joer sinn d'Texter kloer ewéi eng Versecherungszäiten ze berücksichtegen sinn, inklusiv wéivill eventuell Studienzäiten, fir ob 480 Méint ab dem Alter 60 ze kommen dann och ob Basis vun dësem Datum dann eben eng eventuell Prolongatioun vun dësen Zäiten ze determinéieren.

2) Kann d'Madamm Minister eng Tabell presentéieren, déi déi 100 Plazen no der jeeweileger Karriär, CDDen an CDlen, externen Ausschreiwunge souwéi Changements d'administration regroupéiert an all Kéiers preziséieren, ob d'Astellung mat engem Stage verbonnen ass a wéi laang dee géif daueren?

De groussherzogleche Règlement vum 17. Dezember 2025 gesäit eng Extensioun vun 69 Posten am Effectif total vun der Pensiounskeess vir. Hei ass ze preziséieren dass d'Pensiounskeess des Demande vun dem Opstocke vun den Effektiver schonns virun den Diskussiounen iwwer eng eventuell Reform ugefrot huet.

D'CNAP rekrutéiert nëmmen a ganz begrenzte Situatiounen Persounen mat engem befristen Aarbechtskontrakt. Poste ginn och gréisstendeels ausgeschriwwen, sou datt déi extern Kandidaten sech entweder als Fonctionnaire oder Employé oder per Administratiounswiessel melle kënnen. Eventuell kënnen Posten och CNAP-intern besat ginn, duerch eng Mutatioun. An deem Fall géif dann déi jeeweileg Persoun rëm per Ausschreiwung ersat ginn.

Déi planifiéiert Recrutementer vun der CNAP kënnen an der Fiche financière vum Projet vum groussherzoglechen Règlement ënnert dem Link <https://legilux.public.lu/eli/dl/pr/2025/297> consultéiert ginn.

3) Kann d'Madamm Minister matdeelen, wéi eng Qualifikatioun d'Kandidate musse matbréngen? Ginn och geziilt Juristen agestellt, fir op potenziell Gerichtsaffäre virbereet ze sinn?

D'Verdeelung iwwert déi eenzel Carrière kënnen och ënnert dem Link hei uewendriwwer consultéiert ginn.

¹ Loi du 19 décembre 2025 portant modification : 1° du Code de la sécurité sociale ; 2° du Code du travail ; 3° de la loi modifiée du 3 août 1998 instituant des régimes de pension spéciaux pour les fonctionnaires de l'État et des communes ainsi que pour les agents de la Société nationale des Chemins de Fer luxembourgeois.



4) Wéi wäit wäerten déi 100 Leit mat der operationeller Integratioun vun der Reform an d'Aarbechtsfleef vun der CNAP befaasst ginn? Wéi eng aner Aufgabe kënnen si méiglecherweis iwwerhuelen, nodeems de Projet ofgeschloss ass?

D'Augmentatioun vum Effectif total vun der CNAP ëm 69 Poste war scho virum 1. Januar 2026 geplangt, en vue vun der stänneger Croissance vu Pensionären iwwert di lescht an iwwert déi nächst Joren. Déi viséiert Rekrutementen sinn also net nëmme fir de court terme geduecht, mee sollen d'CNAP och à long terme ënnerstëtzen an der Modernisatioun, Simplificatioun an Digitalisatioun vun hire Prozeduren.

5) Ëmfaassen dës 100 Plazen och d'Neibesetzung vu Leit déi an d'Pensioun ginn oder d'CNAP aus soss engem Grond verloossen? Falls jo, kann d'Madamm Minister déi entspriechend Zuele matdeelen? Falls net, kann d'Madamm Minister matdeelen, wéi vill zousätzlech Plaze fir eventuell Neibesetzungen 2026 mussen ausgeschriwwen ginn?

D'Augmentatioun vum Effectif total bezitt sech op nei Ressourcen déi der CNAP zur Verfügung sti wäerten. Leit déi d'CNAP verloossen oder a Pensioun gi wäerten zousätzlech ersat mussen ginn. Di budgetär Gestionsregelen, deenen d'CNAP ënnerleiert, gesinn net vir dass een Depart à la retraite antizipéiert gëtt, wann di jeeweileg Persoun hier Volontéit a Pensioun ze goen nach net manifestéiert huet.

6) Eng kuerzfristeg Erhéijung vum Personal ëm 40 Prozent bedeit dacks och eng logistesche Erausforderung. Kënnen déi 100 Leit all a bestoende Raimlechkeete vun der CNAP ënnerbruecht ginn? Falls net, wéi eng zousätzlech Lokalitéite si fir si virgesinn? Kann d'Madamm Minister d'Käschte vun der Locatioun, respektiv dem Kaf preziséieren?

De Fonds de compensation commun au régime général de pension, deen d'Reserve vum Pensionsregime gëiert, ass Bauhär vun der 2. Phase vun der Cité de la sécurité sociale op der Stater Gare, wou d'CNAP an Zukunftskeess viraussichtlech 2029 eraplännere wäerten.

7) A wéi engem Zäitraum mengt d'Madamm Minister dësen Astellungsprozess kënnen ofzeschléissen? Wéi een Zäitraum gëtt duerno fir d'Formatioun vun deene Leit agerechent? Wéi ee Réckstau un Dossiere kéint sech schlemmstefalls erginn, bis déi 100 Leit voll operationell sinn?

Déi initial Formatioun vun den Agente vun der CNAP dauert am Prinzip genau sou laang wéi déi vu Staatsbeamten, also 2 Joer. Och während dem Stage instruieren di jeeweileg Stagiairen awer schonn Dossierieren, ënner verstärkter Supervisioun natierlech. Mat der Erfahrung, a prinzipiell mat erfollegräich ofgeschlosssem Promotiounsexamen, huet de CNAP-Agent dann een Expertenniveau erreecht, wou e méi villsäiteg agesat ka ginn.

Den Zouwuess vun der Charge de travail vun der CNAP ass natierlech een Defi fir dës Keess, deem si nëmme ka mat méi modern an digitalen Outilen entgéintrieden, zousätzlech zu engem méi héijem Effectif total.



8) Bis wéini sollen déi technesch Dispositiounen fir d'Demande vun der progressiver Pensioun operationell sinn? Kann d'Madamm Minister garantéieren, datt all Bierger dee säit dem 1. Januar 2026 Usproch op eng progressiv Pensioun huet, dës och kann ufroen? Wéi gesäit déi genee administrativ Prozedur aus?

Eng Demande fir eng progressiv Pensioun ka beim Employeur gemaach ginn, wann de Salarié ee Certificat vun der Pensiounskeess bäileet, deen attestéiert datt déi néideg Conditiounen, notament déi vun enger virzäiteger Alterspensioun, erfëllt sinn.

D'Etablissere vun esou engem Certificat ass am Prinzip den zäitintensivste Virgang vun der Prozedur, an haaptsächlech wa mussen d'Versecherungszeiten mat auslännesche Perioden an Ergänzungszeiten rekonstituéiert ginn. Och muss d'Pensiounskeess vum Employeur bestätegt kréien, datt den Assuré di lescht 3 Joer effektiv an engem Rhythmus vu 75% geschafft huet, fir Grenzfäll auszuschléissen.

D'CNAP ass mat der Ëmsetzung vun enger digitaler Demarche op myguichet.lu amgaange fir esou ee Certificat ausstellen ze kënnen. Bis datt esou eng strukturéiert Demarche accessibel ass, ginn Ufroen vun den Assuréeen zu der progressiver Pensioun individuell bearbecht, jee no der Situatioun vum Assuré.

9) Iwwert wéi eng Kenntniss vun eisen dräi administrative Sproochen müssen d'Kandidate verfügen, wuelwëssend, datt de Kontakt mam Public hei naturgeméis virun allem eeler Persounen betrëfft?

De Rekrutement bei der CNAP verleeft no de selwechten Dispositiounen wéi beim Staat. Am Prinzip, ausser bei spezielle Profiller, gi Kenntniss vun den 3 administrative Sproochen virausgesat.

10) Kann d'Madamm Minister eng Tabell presentéieren, déi regruppéiert, wéi wäit sech d'Gesamtkäschte vun der CNAP verdeelt op déi verschidde Posten (Salären, Raimlechkeeten, Material asw.) duerch dës Rekrutement erhéicht?

Ech verweisen op d'Äntwert ënner der Fro n°2.

11) D'Madamm Minister gouf wéi uewen ausgefouert, vun RTL mat de Wierder zitéiert, datt d'Ëmsetzung vun der Reform manner Opwand mat sech bréngt, wéi erwaart. Vu wéi engem zousätzlechen Personalbedarf war d'Madamm Minister deementspreechend ursprénglech ausgegangen?

D'CNAP ass beméit bei der Ëmsetzung vun der Reform nei Akzenter ze setzen, an digital Prozeduren ëmzesetzen, do wou dat méiglech ass a manner Ressourcen-intensiv ass a bleift.

Lëtzebuerg, den 29. Januar 2026

D'Ministesch fir Gesondheet
a sozial Sécherheet

(s.) Martine Deprez